

28/04/2000

Tokoh GPMS diumumkan Isnin

KUALA TERENGGANU, Khamis - Tiga pemimpin Gabungan Pelajar-pelajar Melayu Semenanjung (GPMS) akan diberikan penghargaan sebagai Tokoh GPMS di majlis Jamuan Malam Semarak Perjuangan yang akan diadakan pada 1 Mei ini di Kuala Lumpur.

Setiausaha Agung GPMS, Syed Anuar Syed Mohamad berkata, ketiga-tiga mereka yang akan diumumkan nama secara rasmi di majlis itu banyak membantu meningkatkan kecemerlangan pendidikan kepada bangsa Melayu.

"Pemilihan mereka berdasarkan sumbangan yang diberikan sejak penubuhan GPMS," katanya di sini, hari ini.

Penaung GPMS, Perdana Menteri, Datuk Seri Dr Mahathir Mohamad akan menjadi tetamu kehormat di malam itu dan akan melancarkan Agenda 20, dokumen perancangan GPMS untuk tempoh 20 tahun sehingga 2020.

Syed Anuar berkata, Agenda 20 akan merangkumi perancangan kegiatan ke arah memantapkan fungsi GPMS di alaf baru, bersesuaian dengan kehendak semasa dan akan datang.

Di majlis sama, GPMS akan mengumumkan cadangan untuk menganjurkan simposium memartabatkan tulisan Jawi sebagai salah satu agenda penting bagi menangani fenomena `buta jawi' yang menjurus kepada `buta al-Quran' di kalangan pelajar Melayu.

(END)